

mr.drs. Richard Arends

Na Hulanda e partido politiconan mas importante tin nan 'hala' científico. Nan trabou ta haci investigacion y ehecuta estudionan científico independientemente di e partido. Den esaki nan ta stimula e debate político di un manera obhetivo y crea un ambiente pa autoreflexion. Nan ta aporta cu elementonan esencial na bon maneho político y gubernamental.



PENSANDO 'OUTSIDE THE BOX'

Na Aruba FESCA (Fundacion Estudionan Social Cristian Aruba) ta cumpli cu e rol aki pa partido AVP (Arubaanse Volks Partij). Esun encarga pa cumpli cu e trabou aki ta nan presidente Richard Arends (28), un hoben carismatico y di un intelecto resaltante. E mes, no ta político pa e partido berde, ni ta forma parti di nan organizacion, si e tin un trabou grandi pa haci. **"Semper e funcionamiento di paisnan a interesami"**. Despues di Colegio, Richard Arends a bay Hulanda pa 8 aña y a gradua den Ley Publico Internacional na Universidad di Amsterdam y Administracion Publico cu un specialization den Gobernacion Comparativo na Universidad di Leiden. Cargando e titulonnan di tanto 'meester' como 'doctorandus' a pone cu varios organizacion tanto na Europa y Aruba, tabatin masha atencion pa haya Richard bay traha cu nan. De hecho e tabata den combersacion final cu embahada di Francia, pero tabata un encuentro casual cu Klaas

Tuinstra kende ta encarga cu haci investigacion pa e hala científico di CDA (Christen Democratisch Appel), e partido actualmente na mando na Hulanda, cu a pone Arends considera e trabou. **"Naturalmente mi a evalua e aspecto político, pero e tabata un posibilidad pa haci bon uso di henter mi estudio, sirbiendo mi pais y esey poco biaha ta pasa den bo prome trabou"**. Entrante 1 di juli 2007, el a bira e presidente nobo di FESCA. E ta traha estrechamente cu e Wetenschappelijk Instituut di CDA na Hulanda, y ya conhuntamente nan a produci e raport nobo titula 'Naar een salsa op klompen'. E raport aki ta analisa e relacionan den Reino Hulandes primordialmente for di un punto di bista socio-economico y cultural na lugar di solamente legal y constitucional. Secretario di Estado Ank Bijleveld a priminti di lo trata e raport y su recomendacionnan, segun Arends. **"Actualmente mi ta trahando riba un total di ocho estudio. Mi interes semper tabata pa mehora e**

funcionamento di gobierno, ironico ta cu mi a cuminsa den sector priva cu mi labornan, pero esey ta dunami un perspectiva unico di mira con sector priva y publico ta sostene otro". Na juni di e aña aki e ta entrega e prome di e investigacionnan.

"Mi interes semper tabata pa mehora e funcionamiento di gobierno"

Na Aruba nos ta referi hopi biaha na e 'calidad di bida', pero Richard Arends ta papia hopi di e 'calidad di bida' di Aruba, cu ta bin for di e concepto Hulandes 'leefbaarheid'. **"Cu esey mi kiermen e calidad habitacional, con e infraestructura ta conecta cu otro zona di bo pais, y cu e actividadnan economico incluyendo e cantidad di habitante cu nos isla por acapara, con ta atende tur tres mes hunto. Hasta Antiyas ta gasta mas na infraestructura cu nos"**. E no ta referi na

ordenansa di espacio teritorial (ruimte-lijke ordening) so, sino e kier mira e 'tripod' di tanto economia, infraestructura conhuntamente, hisa calidad di biba na un mihor nivel.

Pa loka ta e cambionan previsto den Reino e ta sinti preocupacion. **"Aruba ta wordo invita como observador pero no ta participe na e cambionan. Mayan Aruba tin cu firma, pero sin por a negocia."**

Richard ta traha for di Aruba, pero en realidad e ta 'log in' na Hulanda, 8000 kilometer mas aleu. E ta haci uso di Skype pa papia cu su coleganan na Hulanda, pero e no por dal un cofi cu su coleganan, pues e tin cu traha hopi independiente. **"Na Aruba mi ta haya bon cooperacion pa mi realiza mi investigacionnan. Mi ta drenta tur departamento y ta combersa ampliamente cu nos expertonan. Mi tarea ta cumpli cu e nivel di e 'wetenschappelijk instituut', cu no ta facil."** Un obstaculo cu tin pa estudio profundo ta e falta di cifranan oficial. Na Hulanda Richard ta bisa cu tin ora nan no por compronde dicon nos (Aruba) no tin cierto cifra. Pa nan sin cifra bo no por traha efectivo. Na Aruba, ainda nos ta campa cu 'bedrijfsgeheimen', haciendo su labor mas pisa. Di un otro banda si e por a haci bon uso di otro raportnan cu a forma e fundeshi di e Aruba cu nos a siña conoce e.o. e rapport di Sam Cole, esun di Mehran di mediado di añanan ochenta, y otro raportnan macro-economico. E ta bisa cu e choice di Aruba pa bay pa turismo tabata friamente calcula. Pero Arends ta bisa cu e problemanan cu nos tin awendia por a keda evita of mengua. **"E mesun problemanan di mercado laboral, di inversion, di productividad, casi tur problema cu nos tin awendia ya caba tabata poni riba papel y pronostica pa hopi aña caba, e idea tabata pa prepara pa e consecucionan a base di bo decisionnan como pais"**. Richard Arends ta sinti cu nos mester bin cu un sistema na unda e 'beroepsonderwijs' tin di responde mas mihor cu nos mercado di labor pa cuminsa drecha nos calidad di biba.

Nos sistema politico te ainda cu atake hopi personal y emocional. Pa e haci su trabou bon, e no ta sigui e desarrayo politico diario di serca, ta e progreso di henter e pais e ta considera.

Mayan Aruba tin cu firma, pero sin por a negocia

E ta kere cu cada tanto tempo un pais tin cu re-inventa su mes y mester pensa 'outside the box'. **"Nos tin cu lubida e formula di 'Aruba One Happy island'. Pasobra si na Costa Rica nan por cobra 1000 dollar pa un camber cu un beach mahos color di santo bruin...nos cu tin santo blanco y ta cobrando menos, dicon? Mi ta kere cu ainda, nos ta den conformismo cu nos turismo. E formula cu nos a usa te awor no ta dunando e rendimiento desea. E diversificacion di nos economia ta wordo proponi pa mas cu 30 aña caba, pero cada bes mas acomodacion ta wordo construi. Riba dje nos nivel di prijs ta por lo menos 15% mas halto cu nos mercado"**. Arends a tende di e presidente di Banco Central Europeo cu e crisis bancario mundial ta mas pio cu '9/11'. **E prijs di petroleo ta riba 120 dollar, si e sigui subi, nos mester ta prepara pa e consecucionan ya cu nos economia ta drei rond di petroleo**, Richard ta agrega.

E hecho cu FESCA ta liga na un partido politico awor no ta molestia Richard Arends mucho, e ta pensa cu al final loka e ta traha cune ta 'facts and figures' cu no tin color y ta su trabou ta keda valido pa tur Arubiano. E ta mira e trabou cu e ta haci como uno profesional y di balor na nivel di Reino. De hecho ta e prome biaha cu e 'thinktank' nan di dos partido politico na ambos banda di Reino ta traha oficialmente hunto. E no tin den su man implementacion di e recomendacionnan, esey ta den man di e politiconan. Ta nan ta keda eligi pa representa pueblo y ora pueblo dunabo confianza, bo mester tin plannan serio, científicamente prepara door di experto di bo pais.

Nos tin cu lubida e formula di 'Aruba One Happy island'

Mirando cu e lo bin den contacto cu politiconan, nos a puntra Richard Arends si e tin interes pa e mundo politico. **"No; mi ta considera e trabou cu mi ta haciendo di hopi valor pa e futuro di nos pais. Como politico bo rol ta bira di implementacion y mi gusta e rol cu mi tin actual. Mi tin hopi aña mas pa bay"**

Mirando su credencialnan, nos ta sigur cu mr.drs. Richard Arends lo haya hopi oferta pa drenta politica, pero e ta insisti cu su interes ta pa sigui contribui cu su investigacion y estudionan, den colaboracion cu su coleganan na Hulanda, pa moldea e futuro relacion di Aruba cu Hulanda. 



Informacion personal

- Comprometi y tin un yiu di 2 aña.
- Edad 28 aña
- Hobby: bon cushina y gourmandise
- Estudionan ta available riba www.fesca.org